



LE  
PELERIN  
DES ANTIPODES.  
RACONTANT DES  
NOUVELLES DE SON  
voyage.

*A Messieurs de la Religion.*

M. DC. XX.

Cass

F

39

326


1620pe

THE NEWBERRY  
LIBRARY

---

---

## LE PELERIN DES ANTIPODES.

 Cilurus Roy des Scythes fut fort aduisé, & fit tres-sagement, quand voulant mon-  
strer à quatre-vingts enfans qui luy estoient nés, comment ils demeureroient inuincibles, & ne pourroient estre surmontez de leurs ennemis : prest à mourir, il se fit apporter vn faisceau de baguettes ou flesches, (on tient qu'il y en auoit autant qu'ils estoient d'enfans) & l'ayant, il le leur mit entremains, auéc commandement à vn chacun d'iceux de le rompre, ou pour le moins d'employer sa force pour ce faire. Eux l'ayant essayé, confesserent que cela surpassoit leur force, & estoit hors de leur pouuoir. Le pere ayant deslié le faisceau, les rompit routes fort facilement l'une apres l'autre en leur presence, quoy qu'il fust fort aagé, & que petites forces luy restassent. Le but de ce Roy estoit de leur apprendre par ce symbole, que tandis qu'ils seroient



ioints & vnis ensemble d'un lien estroit, ils ne pourroient estre rōpus ny dissipez: mais que s'ils donnoient vne fois lieu à la diuision & au discord, que c'estoit fait d'eux, & qu'ils ne pourroient subsister, non pas mesmes deuant les plus foibles & imbecilles. A la mienne volonté ( Messieurs ) que nous eussions tousiours l'action de ce Roy. deuant les yeux, & ce sien fait en la memoire, avec vne ferme resolution de nous y conformer, on ne verroit point les partialitez qui se trouuent entre nous, & desquelles les aduersaires font desia bouclier, se faisans fort de nous accabler bien tost, s'ils peuuent entretenir la diuision qu'ils ont mise entre nous, & faire meurir la pomme de discorde qu'ils ont ietee y a long temps dans nos Assemblees plus notables, & notamment es dernieres: cōcluant tres-bien selon le dire du Sauueur, *que tout Royaume diuisé cōtre soy-mesme sera destruit & vne maison tombera sur l'autre.*

C'est vn des artifices de Satan d'employer la subtilité du Renard, là où il ne peut rien par la force du Lyon. Il scait

bien qu'il ne peut rien contre l'Eglise  
 de Dieu tandis que les fideles n'ont  
 qu'un cœur & vne ame, & nourrissent  
 vne bonne intelligence pour l'affermis-  
 sement du seruice de Dieu ; mais aussi  
 cognoist-il, qu'il a vne fort belle en-  
 tree pour rauager l'heritage du Sei-  
 gneur, quand ceux qui en sont comme  
 les depositaires s'annonchalissent en  
 leur deuoir, & au lieu de le conseruer,  
 l'exposent en proye par leurs discords  
 interieurs & exterieurs qu'ils nourris-  
 sent les vns contre les autres, ceux-là s'e-  
 studians à destruire en vn moment ce  
 que ceux-cy ont basti & edifié avec be-  
 aucoup de peine & de sueurs, & au lieu  
 de pousser à qui mieux mieux à l'aduan-  
 cement du regne de Iesus-Christ, s'em-  
 ployent tant qu'ils peuuent à le ruiner,  
 par les contradictions qu'ils opposent  
 les vns aux autres, & comme s'ils estoient  
 ennemis mortels, n'ont autre but que  
 de s'entre-refuter leurs raisons, & réduire  
 les Assenblees, esquelles ils se trouuent,  
 inutiles & infructueuses, au lieu qu'ils  
 deuroient leur procurer de l'vtilité.

Mais ce seroit peu de chose, si cela



se faisoit seulement aux Assemblies & dans l'enclos des lieux ou elles setiennent, & si là elles se terminoient: Mais que ce soient animositez qui prennent & qui croissent de iour en iour. Voire qui se publient par tout, par le moyen des liurets qui courent, c'est ce qui est estrange. Et neantmoins ces choses ne se publient pas par gens du commun ny de basse estoffe, mais par ceux qui sont les principaux entre nous, & auxquels appartient, selon le deu de leurs charges, d'entretenir l'vnion au Seigneur, & d'assoupir selon leur pouuoir les discords & diuisions qui se peuuent rencontrer parmi telles assemblies.

Or entre ces liurets en court vn tres-dangereux, au moins en vne de ses parties intitulé, *Les Antipodes pour & contre*, & ce d'autant plus qu'il couure son venin du nom saint & sacré d'obeissance au Roy, à laquelle il pretend exhorter l'Assemblée de Loudun, comme si elle s'en estoit departie, ou auoit eu dessein de s'en departir. Or ayant depuis peu voyagé en ces lieux-là, & en retournant tout fraichement, i'ay creu vous

estre obligé de vous adresser ce mot , & en iceluy vous dire ce que i'ay appris en ces pays -là, non pour vous induire à rebellion contre vostre Souuerain , mais pour dōner d'autāt plus de sujet de vous affermir au seruice de Dieu , & à vne sainte & bonne resolution de le maintenir , à l'encontre de ceux qui s'efforcent de l'abolir. Je sçay bien que la plupart d'entre vous , discerne assez & recognoist la mauuaise foy de l'Auth eur d'iceluy , quoy que couuerte de specieuses raisons, mais aussi y en a il assez d'autres qui n'ayans pas l'esprit de discretion , se laisseroient incontinent aller à la persuasion de ce langage fardé. C'est donc à eux plus particulierement , quoy qu'à tous en general , que ce qui suit appartient & est donné , afin qu'ils se donnent garde d'estre pipez & seduits par Satan , qui met telles choses en auant.

Pour recognoistre de quel piedchemine l'Auth eur de ce liure , & qu'elle est son affection ou seruice de Dieu & des Eglises , il est à remarquer qu'il ne s'est pas contenté de s'employer de parole & d'escrit à nous diuiser les vns d'auec les au-



tres, en nous donnant *Pour & Contre*, mais il s'est hazardé iusque-là que d'envoyer son escrit imprimé, si tost qu'il fust sorty de deffous la presse, dans des paquets bien fermez aux Ecclesiastiques qui ont la vogue en Cour, & qui tiennent les premieres places dans les Conseils d'Estat, indice tres asseuré qu'il s'entend tres bien avec eux, & que sans doute il a esté recompensé pour ce faire: ou bien pour se les rendre fauorable, s'ils aduenoit que de la profession de l'Euangile il passast au Papisme, ou plustost à l'Atheisme: mais disons des Antipodes.

Personne n'auoit encores enseigné que l'obeyssance de Dieu & l'establissement de son seruice, fussent choses contraires à l'obeyssance & respect que doiuent les sujets à leur Roy & legitime Seigneur. La parole de Dieu nous apprend que ce sont choses coniointes; Sainct Pierre nous dit, *Que nous craignons Dieu & que nous honorions le Roy; que nous soyons sujets à tout ordre diuin & humain pour l'amour de Dieu, faisant mention du Roy & des autres Superieurs*: Et Sainct Paul veut, *Que nous nous y submettions non seulement à cause de l'ire*

l'ire, mais aussi pour la conscience, pour ce que le Roy est ministre de Dieu, disant plus haut que quiconque résiste à ces puissances résiste à l'Ordonnance de Dieu: que le Magistrat est gardien de la première & seconde Table de la Loy: Toutes lesquelles choses montrent que la piété ne renuerse point les Estats, mais que plustost elle les establit & rend florissant: Mais voicy vn enseignement tout contraire, confirmé par les pretendus raisons; & déclaré assez ouvertement par vn titre de contrariété; Car que veut dire ce mot d'*Antipodes*, sinon pied contre pied; façon de parler prise de ceux qui ioustans ensemble, ont accoustumé de se mettre en ceste posture, & puis employer leur force à se renuerse l'un l'autre, l'un deux demeurant debout. Titre qui nous montre que le but de ce Docteur n'est autre que de nous enseigner, contre toute verité, que l'affermissement au seruice de Dieu ne peut subsister avec l'obeyssance au Roy, & que ce sont choses contraires; aussi les traite-il comme diametralement opposees, & en tire des conclusions directement contraires.



Je pourrois me contenter de luy dire que son liuret est inepte, ce qu'on peut recognoistre par la seule consideration du titre qu'il porte, veu aussi ce que dessus: mais afin qu'il apparaisse mieux, il est conuenable d'employer quelques pages en la consideration des principales raisons qu'il apporte, pour seruir de sucre & de sirop à ceux qui voudront prendre la potion enuenimee, voire pour les y semondre & comme forcer leur donnant dans la visiere. Ce liuret contient deux parties, l'une traite de l'affermissement de l'Assemblée, & apporte des raisons tres-preignantes pour la subsistance, iusqu'à ce que les iustes Requestes de vos Deputez soient responduës en Iustice, & que leurs tres-humbles supplications soient entenduës, & qu'ils sentent le fruit de leurs prieres; & avec eux toutes les Eglises pour le bien desquelles ils sont Assemblez, & pourtant en cela ne luy contredit on point, ains il est remercié de la peine qu'il a prise en ce sujet: L'autre parle de l'obeyssance pretenduë, & tend à des-vnir les cœurs de ceux de la mesme Assemblée, afin de la separer sans



auoir aucun contentement , & ainsi la  
rédre aussi inutile & infructueuse que les  
autres precedentes. Et c'est ce dont nous  
auons à voir les raisons , sinon toutes , au  
moins les principales , & en monstrier la  
nullité.

Sa premiere raison page 18. est ap-  
puyee sur vne fausse hypothese , & par-  
tant tombe d'elle-mesme : car il presup-  
pose que le but de l'Assemblée soit ou ayt  
esté , de se venger elle-mesme du tort  
qu'elle à receu de ses ennemis , & de se  
faire Iustice par ses mains en la propre  
cause, ce qui ne se peut verifier ; veu qu'il  
appert par l'article mesme d'affermisse-  
ment, qu'elle n'a eu autre dessein que de  
remettre la vengeance à Dieu auquel elle  
appartient , & de demander humble-  
ment Iustice au Roy , lequel la doit don-  
ner à son peuple , & ne leur peut tourner  
à blasme , si à l'exemple de ceste vefue  
dont est parlé en l'Euangile , ils ont essayé  
d'obtenir par importunité , ce qu'ils voyoient  
ne leur auoir esté donné , ains refuse de prime  
face & à vne simple demande. Cefonde-  
ment donc calomnieux osté , le basti-  
ment s'en va bas.

La seconde, *Ibid.* est soustenuë de la promesse faicte au Roy, au nom des Eglises Assemblees à Vitray, de ne se point départir de son obeyssance & du service que nous luy devons.

Promesse que nous reysterons encores maintenant, & prions vn chacun de la garder soigneusement, tandis que la cause de Dieu ne sera point interessee: Condition requise par S. Pierre mesme, *Qui nous enseigne qu'en ce cas nous devons plustost obeyr à Dieu qu'aux hommes.* Or qui ne voit qu'aujourd'huy tout le monde nous en veut? Ceux qui entrent dans les Conseils les plus secrets ne parlent que de vous assassiner, ou pour le moins de vous tenir en servitude, telle que souffrent les pauvres captifs entre les Turcs, ou si on vous quitte à meilleur marché, estre comme les Juifs errans ç'a & là par le monde, sans aucune retraite asseuree; Et pourquoy cela sinon par la Religion que vous maintenez? Certes si vous aliez à la Messe on ne tiendrait pas de tels discours, ou n'auroit pas de tels & si sanglants desseins. C'est ce qui se publie aujourd'huy parmy ce Royaume avec per-



mission & approbation, en des liurets où vous estes inuitez ou à la Messe ou à la mort, c'est à dire à la mort du corps ou à celle de l'ame.

Mais posé que ces desseins ne fussent point en l'ame de vos aduersaires ; le diray que ceste raison est appuyee sur le mesme fondement ruineux de la premiere & partant elle est nulle. Accordons neantmoins que son fondement soit bon, ce que non ; estans obligez de rendre obeyssance au Roy ; sommes-nous pourtant tenus d'obeyr à tous ceux qui le captiuans, & luy faisans arrester tout ce que bon leur semble, voire souuent font beaucoup de choses sans son sceu, & ainsi abusent de son nom & de son authorité ? Leur auons nous promis quelque obeyssance ? Il nous faudroit monstrier que tout ce qu'on nous fait & dit contre la forme des Edicts ; contre les loix de l'Estat, contre les Ordonnances diuines & humaines, vient de la part du Roy (i'entens de sa propre personne & de son propre mouuement) & puis apres nous exhorter à l'endurer & supporter patiemment.

Autrement on doit tenir pour resolu, que venir aux extremittez, & endosser le

harnois contre tels tyranneaux ( ce que l'Assemblée n'a fait ny voulu faire ) seroit seruir le Roy & non pas contreuenir à l'obeyssance qui luy est deuë.

La troisieme & quatrieme raisons pages 19. & 20. sont basties sur le mesme fondement & pour ce nulles: Mais au surplus elles nous apprennēt la doctrine des Anabaptistes, nous disant que deffendre l'Eglise par armes n'est point agreable à Dieu, & que c'est estimer du Royaume de Iesus-Christ comme du monde, paroles qui condamnent les Iuifs tant loüez en l'Escripture pour le courage qu'ils monstrent en rebastissant les murailles de Ierusalem, sous la conduite d'Eldras & de Nehemie, en ce que bastissant d'une main, de l'autre ils tenoient l'espee pour repousser l'ennemy qui les vouloit empescher & inquieter en vn œuure si saint. Celuy-cy au contraire nous voudroit empescher mesmes de manier les armes ( disant que Iesus-Christ ne nous a laissé que le glaue de la parole de Dieu, surquoy ce Docteur d'Antipodes se fouiendra qu'il est parlé de deux au texte d'où il a pris cela ) & nous voudroit persuader que se seruir des moyens que Dieu



nous met en main, c'est se deffier de sa providence & le tenter, pour ce qu'il nous peut bien deliurer quand il luy plaira, sans ces moyens là ; C'est autant que s'il nous disoit ; Dieu vous peut nourrir sans pain, gardez-vous donc bien de manger. Dieu vous peut guerir de vos maladies sans Medecin, ny Medecine, n'en vsez donc point, & ainsi des autres : Car qu'est-ce que Dieu ne peut point faire sans l'homme ? C'est donc tout au contraire tenter Dieu de ne se point servir des moyens qu'il nous donne pour nostre conseruation. Il y a plus, nos peres sont icy accusez, d'auoir fait chose des-agreable à Dieu, & d'auoir esté rebelles au Roy, quand en se conseruant eux-mesmes, ils nous ont au prix de leur sang acquis le moyē de iouyr de la liberté Chrestienne que nous auōs en Iesus-Christ, faisans par ce mesme moyen que nous ne fussions pas accablez du ioug de la seruitude Papale dōt on nous vouloit charger.

*Mais vous en pourrez vser quand le mal sera venu, lors vous courrez aux remedes. Dites de mesmes, vous fermerez vos coffres quand vos tresors seront emportez : vos estables quand les cheuaux seront destro-*



bez: vous prendrez les armes pour vous deffendre, quand vous aurez le cousteau sous la gorge, mais bien avant dans le sein: en fin vous conseruerez vos vies, quand l'ennemy vous les aura ostees. Iugez s'il y a là de la raison. *Si est-ce pourtant, dit-il, que l'Eglise se porte mieux au temps de l'aduersité qu'en celuy de la prosperité.* Cela est vray quant à son estre interieur, qui est la foy laquelle ne peut estre aneantie des hommes, qu'au contraire elle est la victoire du monde; mais ne deuons nous seruir à Dieu qu'interieurement? A il repudié du tout le seruice exterieur? Et s'il l'a pour agreable, voire s'il est necessaire, comme dit l'Escriture, ne seront nous pas condamnables, si par nostre nonchalance & paresse, voire par nostre malice deliberee, nous perdons le moyen de le seruir en mesprisant les occasions de conseruer son seruice exterieur, marque certaine de l'interieur? C'est chose certaine.

*Mais en mettant le Presche en peu d'endroits, nous ferons des & reuoltes des Arhees par tout.* Voicy vn cas estrange, que ceux qui ne scauroient faire vn cheueu blanc ou noir, puisse faire les hommes melchants, estans  
bons

bōs & fideles, faire des infideles : mais que cela soit attribué à la predicatiō de l'Euan-gile, de la doctrine de salut, c'est ce qu'on ne sçauroit dire sans blaspheme, ny penser sans horreur.

*Si est-ce qu'en cecy il faudroit que la lampe de l'Escripture esclairast nos pas.* Si tout ce qui est escrit l'est pour nostre endoctrinement, il est aisé à ceux qui veulent voir combien d'exemples nous fournit l'Eglise d'Israël, sans lesquels citer, nous renuoyōs cēt esprit de contrarieté à celui que nous auons allegué cy deuant.

Finalemēt, par ceste raison est condamné tout le soin qu'on prend aujour-d'hui pour la conseruation des Eglises : car puis que Dieu vous peut conseruer sans moyens humains; à quoy faire tant d'As-semblees ? pourquoy des Deputez en Cour ? à quoy bon auoir des villes de seu-reté ? tout cela est inutile, & ceux qui se ser-uent de ces moyens se deffient de la proui-dence de Dieu, & luy veulent prescrire les moyens de conseruer les siens. Mais qui ouyst iamais dire, qu'employer de tres-humbles prieres enuers le Roy fust chose des-agreable à Dieu ? C'est tout ce qu'à fait



l'Assemblée.

*Nous n'avons plus, dit-il, page 20. de Cymons & de Temistocles, ce ne sont que Demosthenes & Pygmees. Nos Boüillons ne forceront plus le dessein, nos l'EsdiGUIERES ne rechasseront plus la persecution dans sa source.*

Mais cet homme croit-il qu'à mesure que les grands auancent en aage, ils diminuent en pieté & en courage? Ils estoient, dit-il, au dessus du commun en courage: Et n'y sont ils plus? Sçache toute la France que s'ils ont bien fait par le passé en la deffence des Eglises, ce qu'on ne peut nier, ils sont encores tous prests d'employer leurs honneurs & leurs vies pour l'aduancement du regne de Iesus-Christ. Mais quand il dit qu'ils ne le feront plus, ne se souuiet-il point que Dieu peut donner des forces extraordinaires aux vieillards pour son seruicé, aussi bien qu'aux petits enfans, trempant leurs cœurs d'une trempe d'acier, comme il dit page 23. Mais l'illustré posterité que le Seigneur a donnée à ces grands Capitaines, ne fera elle point héritiere de la pieté & magnanimité de ses Peres, aussi bien que de leurs noms & moyens? Certes l'instructiō qu'il leur ont

donnee & le pied duquel ils cheminent, monstrent ce que nous en deuons attendre. A quoy bon tout ce qu'il entasse, pag. 21. & sui. des ieunes Princes de nostre profession, (qu'il appelle par excellence & hōneur sans doute, ieunes iouieurs) sinon à leur faire perdre courage, & les induire à prendre des resolutions toutes contraires à ce qu'ils doiuent aux Eglises, à quitter la partie, & ietter, comme on dit, le manche apres la coignée? Il ne vise à autre but.

Ce qu'il dit pag. 24. des ialousies, dissentimens, passions particulieres, desseins brigues & parties, luy conuient mieux, qu'à nul autre, estant chose certaine que les pistoles l'ont possédé, & tellement attiré, que quittant le seruice de Dieu & de l'Eglise, renonçant à son deuoir enuers sa prouince, voire forçant sa propre cōscience; il s'est donné au seruice de Mammon, & s'est laissé emporter à l'auarice, trahissant sa propre cause pour vne poignée de poussiere: & puis apres publie par tout ce dont il deuroit auoir honte & vergogne, & en rougir deuant Dieu & deuant les hommes.



Il continuë en sa fausse hypothese & à bastir sur le fondement de son imagination: Nous montrons par long discours, & comme à perte de veuë qu'elle est la grandeur de la Majesté Royale; combien c'est chose dangereuse de s'esleuer contre son Roy & cōmettre le crime de rebelliō; que l'obeissance au Roy est grandement vtile & necessaire; que la guerre traine apres soy vne Iliade de maux & de miseres; choses que nous cognoissons & aduouons les ayans apprises de la parole de Dieu, & auxquelles il n'y a nul qui contredise ou vueille contredire: & partant cet homme combat contre son ombre, & employe le temps à battre l'homme de paille que luy mesme s'est opposé. Mais il continuë en sa calomnieuse supposition, nous voulant faire croire que nous sommes ceux-là qui embrassent la rebellion & reiettent l'obeissance que nous deuōs à nostre Roy, & c'est ce que nous nions & ce qu'il ne prouue point, voire ce dont il recognoist le contraire, pag. 35. alleguant l'article d'affermissement, pour accorder, à la façon de S. Yues, ce qu'il confesse n'estre point en discord.



Nous nereuoquons non plus en doute la parole que le Roy nous donne de nous faire Iustice, quoy que souuent esfois, mais presque tousiours, nous ayõs experimenteré, que ce sont esté vrayement des paroles sans effect qu'on nous a donnees, & ne faut trouuer estrange si on ne nous tient promesse, puis que c'est vne des maximes Romaines bastie au conciliabule de Cõstance, *Qu'il ne faut point tenir la foy aux heretiques:* (Ainsi plaist-il à l'Antechrist que nous soyons qualifiez) mais aussi puis que souuent on ne la tient pas aux pretendus Catholiques, non pas mesmes aux premiers du Royaume. Mais vous vous contenterez pour le present de la parole du Roy, assurez qu'il ne vous peut donner autre chose, & attendrez que ceux qui le tiennent captif, tournent son cœur où bon leur semble, & manient ses volonteze & toutes autres choses dans l'Estat à leur desir, ayent pour agreable qu'il vous donne d'auantage, & vous face sentir les effects de vos prieres si souuent reiterees.

Face le Seigneur que nostre Roy reconnoisse la sincerité de nostre obeissance, apres des mauuaises impressions que

s'efforcent de luy donner ces calomnieux, & à ce que Dieu leur donne vn esprit de paix & de concorde, au lieu de celui de contradiction & de diuision qui les possede, afin qu'ils ne separent ny opposent iamais ce que Dieu a si estroittement conioint.

Je concluderay ce discours par le vœu de l'Apostre: *À la mienne volonté, que ceux qui vous troublent fussent retranchez, afin que selon la priere du Seigneur Iesus, vous soyez vn entre vous, voire avec luy, comme il est vn avec le Pere: non que nous vous desirions vne vnitè d'essence, cela ne se trouue qu'en Dieu seul, mais que vous ayez vn mutuel consentement entre vous: que tout ainsi que vous sentez vne mesme chose au Seigneur quant à la doctrine, vous ayez aussi vne mesme volonté pour continuer à son seruice, pour le maintenir & pour vous opposer, assistez de la grace de Dieu, comme vn mur d'airain à tous ceux qui le voudroient destruire, mais qui desia osent y attenter: que iamais vous n'enduriez que le corps mystique de Iesus-Christ soit diuisé par les aduersaires; mais gardez-vous bien de le diuiser & déchirer vous mesmes par vos diuisions & partialitez, & ne donnez point de suiet à l'aduer-*



23  
faire de dire véritablement ce que faussement il  
a dit iusques à maintenant, qu'autant que vous  
estes de testes, autant auez vous de resolutions:  
mais ralliez vos cœurs & vos courages, chas-  
sans l'esprit de diuision du milieu de vous, & y  
nourrissez la paix & la concorde; ce faisant  
vous serez en frayeur à vos ennemis; ils diront  
tous espouuantez: Le Seigneur est pour eux, &  
pourquoy les offenserions-nous? Ainsi vous vi-  
urez heureux & contents seruans à Dieu &  
au Roy, selon que vous y estes obligez & l'Eter-  
nel sera le rocher de vostre salut & deliurance.  
C'est ce dont ie le supplie de toute mon  
affection.

*Concordia parua res crescunt, discordia  
maximæ dilabuntur.*



